

Noticia  
Transparente  
di Gobierno

# ISLA ONLINE

Diabierna 24 Mei 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



ARTE DI MURAYA  
SAN NICOLAS



**STABILIDAD  
Y  
PROSPERIDAD**

2 0 2 4



**Gabinete Wever-Croes**





**Despues di negosacionnan intenso**

## **ARUBA Y HULANDA TA YEGA NA UN ACUERDO HISTORICO Y LO FIRMA E RIJKSWET HIBRIDE**

**"E interes riba e fiansa di Covid ta baha y cu esaki e aña aki mesora tin 16 miyon florin cu ta bira disponibel pa reaslisa proyectonan"**



Diabierna mainta 24 di mei, Gobierno di Aruba a anuncia un logro hopi grandi y historico pa Aruba, cu beneficianan pa nos futuro generacionnan. Prome Minister Evelyn Wever-Croes, durante e conferencia di prensa a anuncia cu gobiernonan di Aruba y Hulanda a yega na un acuerdo, despues di negosacionnan hopi intenso.

### **ACUERDO LEGAL HIBRIDE**

Gobierno di Aruba y Gobierno di Hulanda a yega na un acuerdo di un Rijkswet hibride manera Aruba a propone. Den e Rijkswet aki ta regla e definicion di e normanan y den landsverordening, ley local (LAft) ta regla e normanan financiero, manera e ta awor den e LAft.

### **CONTENIDO DI E RIJKSWET**

Prome Minister a indica cu e rijkswet lo contene tambe, entre otro: Supervision financiero; Escalacion; Posibilidad pa PPP bou condicionnan estricto y; Areglo con ta sali di e rijkswet (exit bepaling).

E rijkswet mester wordo entrega na e Parlamentonan prome cu 1 di mei 2025.

### **BENEFICIO PA ARUBA**

E acuerdo cu a wordo firma diabierna mainta entre Aruba y Hulanda, ta contene varios beneficio financiero cu Aruba ta haya a cambio, entre otro:

1. Interes abou riba fiansa di Covid, awor mesora e ta baha di 6.9% pa 5.1%;
2. Unabes e rijkswet ta cla, e interes ta baha na 3.4%;
3. Ademá, pa prome biaha riba mesa, Hulanda lo por refinancia tambe e debe externo existente di pais Aruba, esaki ta e debe cu a wordo redobla bou di e gobierno di AVP. Te cu awor Aruba ta pagando te na 7%, lo por baha te na 3.4% si Hulanda refinancia. Aruba a bin ta purba pa logra e acuerdo aki pa mas di 10 aña y awo Gobierno ta logra esaki cu ta un parti hopi importante di e acuerdo cu ta riba mesa;
4. Lo cambia e normanan financiero pa haci nan mas flexibel, cu ta permiti Aruba haci e inversionnan necesario, entre otro un prison nobo, cu normalmente Aruba no por yega na financia esakinan debi cu nos normanan financiero ta hopi rigido. Y tambe pa crece socio economicamente. Pa esaki Gobierno di Aruba ya a acerca IMF caba y ta trahando riba e revision aki.



Continuacion **ARUBA Y HULANDA TA YEGA NA UN ACUERDO HISTORICO....**



Prome Minister a remarca cu e acuerdo aki ta dentro di e mocionnan di Tweede Kamer na Hulanda cu pa Gobierno di Aruba ta menos relevante, pero specialmente, e ta dentro di e mocion cu Parlamento di Aruba a duna aña pasa cu ta urgi Gobierno pa sigui negocia teniendo cuenta cu algun aspecto.

**DESPUES DI FIRMA E ACUERDO AKI**

Conseho di Minister di Reino diabierna mainta a aproba e acuerdo aki y despues di a firma e acuerdo, e interes riba e fianza di Covid ta baha mesora di 6.9% pa 5.1%, cu esaki e aña aki mesora tin 16 miyon florin cu ta bira disponibel pa reaslisa proyectonan. Tambe lo trek in e ley di RAft y mesora y lo cuminsa traha riba e detayenan di e rijkswet pa presenta na nos parlamentonan no mas tarda 1 di mei 2025.

**DESPUES CU E RIJKSWET WORDO ACEPTA**

Prome Minister a indica cu despues cu e rijkswet wordo acepta pa nos Parlamento y pa Tweede Kamer, e interes riba Fianza di Covid ta baha na e nivel cu Hulanda ta paga na interes mas un opslag di 0.2% (esey lo ta awor 3.4%). Tambe, unabes cu e Rijkswet ta cla, Hulanda ta dispuesto pa schrijf in y refinancia nos debe externo pa e baha pa e mesun interes di 3.4%.

Prome Minister Evelyn Wever-Croes: “Mi ta gradici esnan cu a asisti mi den e negociacion cu Hulanda, tambe e team Hulandes y Secretario di Estado van Huffelen y tambe coleganan minister di Gabinete Wever-Croes II pa e sosten y apoyo. Semper mi a bisa cu (1) nos ta keda na mesa pa negocia na forma serio, y (2) cu mi tin tur fe y confiansa cu nos lo logra un bon deal pa Aruba. Awe nos a cumpli un biaha mas. Negociacionnan no tabata facil pero nos a keda firme, cu respet, y enfoca riba e interes general di henter nos comunidad. Awor caba nos lo scapa 16 miyon tur aña na interes, si nos logra un Rijkswet, e beneficio por ta mucho mas grandi”.

### DESPUES CU E RIJKSWET WORDO ACEPTA PA NOS PARLAMENTO Y PA TWEDE KAMER

- E interes riba Fianza di Covid ta baha pa e interes cu Hulanda ta presta + 0.2% (esey lo ta awor 3.4%)
- E interes riba nos debe externo tambe lo baha pa e interes ey, 3.4%

Gabinete Wever - Croes II

### ACUERDO LEGAL HIBRIDE

- Den rijkswet ta regla e definicion di e normanan
- Den landsverordening ta regla e normanan financiero, manera e ta awor den e LAft

Gabinete Wever - Croes II

### CONTENIDO DI E RIJKSWET

- Supervision financiero
- Escalacion
- Posibilidad pa PPP bou condicionnan estricto
- Areglo con ta sali di e rijkswet (exit bepaling)

Gabinete Wever - Croes II

### ENTREGA DI E RIJKSWET NA PARLAMENTONAN

- Prome cu 1 di mei 2025

Gabinete Wever - Croes II

### BENEFICIONAN PA ARUBA

1	2	3	4
Interes abou riba fianza di Covid, awor mesora e ta baha di 6.9% pa 5.1%,	Una bes e rijkswet ta cla, e interes ta baha na 3.4%	Interes abou riba debenan externo existente, cu awor ta yega te na 7%, lo por baha te na 3.4%	<ul style="list-style-type: none"><li>Defini normanan financiero nobo, cu ta permiti Aruba haci e inversionnan necesario</li><li>Crece socio economicamente</li></ul>

Gabinete Wever - Croes II

### DESPUES DI FIRMA E ACUERDO

1	2	3
<ul style="list-style-type: none"><li>E interes riba e fianza di Covid ta baha mesora di 6.9% pa 5.1%,</li><li>cu esaki e aña aki mesora tin 16 miyon florin cu ta bin disponible pa proyectonan</li></ul>	Lo trek in e ley di RAft	Lo cuminsa traha riba e rijkswet pa presenta na nos Parlamentonan mas tarda 1 di mei 2025

Gabinete Wever - Croes II



**Prome Minister Evelyn Wever-Croes:**

# **MENASA NA PARLAMENTARIO Y MINISTERNAN NO TA ACCEPTABEL**

**“Mi kier haci un apelacion na comunidad pa hunto nos salvaguardia e estado di derecho y no normalisa e tendencia di menasa aki”**



Diabierna mainta 24 di mei, despues cu Prome Minister Evelyn Wever-Croes a anuncia cu gobiernonan di Aruba y Hulanda a yega na un acuerdo, despues di negosacionnan hopi intenso, na beneficio di nos pais, Prome Minister a tuma e oportunidad pa haci un apelacion na comunidad di Aruba.

Ta asina cu informe a yega cerca Prome Minister cu den e ultimo lunanan algun miembro di Parlamento di coalicion y oposicion lo a wordo menasa. Esaki, den un pais cu ta biba den un libertad di expresion y democracia, no por ta acceptabel.

Prome Minister a enfatisa cu pa garantisar bon gobernacion den nos pais, e ta necesario cu parlamentarionan, ministernan, y empleadonan publico por eherce nan funcion sin cu nan ta wordo confronta cu intimidacion, agresion of cualkier otro influencia cu por stroba, of mina nan funcionamiento.

Libertad di expresion ta un derecho fundamental di nos tur. Diferencia den ideologia politico ta cosnan cu semper nos a biba cu ne y cu ta esencial den un estado di derecho. Sinembargo menasa un parlamentario sea den coalicion of oposicion, un

minister, un empleado publico, no ta acceptabel.

“Mi kier haci un apelacion na comunidad pa hunto nos salvaguardia e estado di derecho y no normalisa e tendencia di menasa aki. Gobierno ta tuma esaki hopi na serio y lo percura pa e intimidacion aki wordo atendi pa proteha e victimanan contra esaki. Hunto cu comunidad completo nos por bringa e fenomeno aki”, Prome Minister a expresa. ■■■■







## BESPARING BOU DI RIJKSWET NOBO LO PERCURA PA UN REPARTICION MAS HUSTO DI NOS FINANSAS PUBLICO



Gabinete Wever-Croes II ta anuncia awe mainta cu a yega na un acuerdo entre gobierno di Aruba y Hulanda.

Den e acuerdo hibride aki lo regla e definicion di e normanan di e rijkswet y e normanan financiero via un landsverordening, manera cu ta awor den LAft. E acuerdo aki tambe lo contene, entre otro, supervision financiero, escalacion, posibilidad pa Public Private Partnership y areglo pa con ta sali di e rijkswet.

Manera cu e acuerdo aki wordo firma lo tin un reduccion den e interes di nos debe cu Hulanda di 6.9% pa 5.1%. Pues esaki ta nifica cu pa aña lo tin un suma di 16 miyon florin cu awor por wordo uza pa reinverti ariba nos pais. Un monto cu lo crece ainda mas ora cu e rijkswet keda cla y e interes baha na 3.4%.

Cu e espacio financiero adicional, pais Aruba por percura pa

e fruto di nos economia yega na esnan mas vulnerabel den nos comunidad. Un reparticion mas husto lo nifica mehoracion den e bienestar di nos Adultonan Mayor. Mihor cuido, mas accesibilidad y amplio participacion ta entre e metanan mas importante di e Ministerio di Asuntonan di Adulto Mayor. Tambe, lo enfoca ariba e retonan cu cambio climatico ta impone ariba nos isla. Un proceso cu sigur mester di nos atencion inmediatamente.

Aruba a demostra cu e por maneha su finanzas publico responsablemente. Esaki ta duna un señal sumamente positivo na es cu kier inverti ariba nos isla y na su turno yuda nos crece nos economia. Un economia fuerte di cual nos tur por beneficia. Especialmente esnan mas vulnerabel.



**Minister Ursell Arends:**

# CALOR EXTREMO TA UN PROBLEMA GRANDI PA ADULTO MAYOR CU NOS MESTER ATENDE



Dia 22 di mei a tuma lugar un reunion yama pa Minister Ursell Arends encuanto calor extremo na Aruba cu ta impacta adulto mayor como grupo vulnerabel. Entre e stakeholders presente tabata Directie Natuur en Milieu, Horacio Oduber Hospital Aruba, diferente casnan di cuido, y Directie Ouderenzaken. E meta principal di e reunion tabata pa cada stakeholder por trece nan preocupacion dilanti y propone e miho practicanan y adaptacionan cu mester tuma lugar pa yuda e adultonan mayor durante e periodonan di calor extremo.

Durante e reunion, Departamento Meteorologico a duna un presentacion tocante kico un ola di calor ta nifica. Nan a splica cu Aruba lo experencia calor extremo te cu october y cu cada aña ta bay bira mas calor mundialmente. E casnan di cuido a conta nan experencia di con nan ta trata di evita molester pa nan cliente, pero nan a reconoce cu e calor actual ta un reto grandi.

Na final di e reunion Minister Arends a invita tur stakeholder pa comparti nan experencia y ideanan dentro di un siman di tempo, pa asina hunto por pensa creativamente pa busca manera di reduci gasto relacionado cu e aumento di calor. A base di e informacion comparti por sigui hiba discusion. Den cuadro di esaki a invita esnan presente pa bini bek pa un siguiente reunion den dos siman di tempo.

Minister Arends ta gradici tur stakeholder cu a forma parti di e reunion y ta spera cu e colaboracion aki lo contribui na e bienestar di nos adultonan mayor durante e periodonan di calor extremo.

“Ami ta sigur cu, cu e colaboracion y compromiso di tur presente, nos lo por enfrenta e desafionan di calor extremo y haya resultado positivo pa nos adulto mayor,” Minister Arends a comenta finalisado e reunion.

SINTONISA

CONFERENCIA DI PRENSA  
DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM



**Minister Ursell Arends:**

# MINISTERIO DI NATURALES Y STAKEHOLDERS TA UNI NA BIENESTAR DI NOS ANIMALNAN



Diabierna 24 di mei 2024 a tuma luga un reunion conhuntamente cu diferente stakeholders pa trata e bienster di nos animalnan como tambe pa atende e cambionan di maneho y reglanan di CDC na merca cu lo drenta na vigor entrante 1 augustus venidero.

Tur presente a ricibi un presentacion di e maneho nobo 'Maneho Bienestar di Animal Aruba' cu tin como vision pa mehora e bienestar di animal y crea un Aruba cu ta mas amabel cu nan.

Mientras tanto ta siguiendo e desaroyo na merca cu ta stipula cu entrante 1 augustus venidero CDC (Center of Disease Control) na merca ta introduci un maneho nobo pa admision di cacho.

E maneho nobo ta stipula cu tur cacho cu bay merca mester ta:

- o Minimo 6 luna bieu
- o Tin tur vacuna incluyendo di rabies
- o Mester tin microchip

Esaki ta nifica cu e cantidad pronostica di 2000 puppies no lo por bay merca prome cu nan yega 6 luna di edad despues di 1 augustus venidero. E resultado di esaki lo ta negativo pa Aruba si no actua di awo. Mirando cu nos lo tin cu bay experiencia un crecimiento acelera di e poblacion di cacho cu ya caba nos ta atendiendo cune. Y nos ta pronostica cu mayoria di esakinan lo por wordo abandona rond di Aruba.

Pa e situacion aki no yega asina leu, nos a sinta cu stakeholders importante pa yega na un plan di accion y mitiga e impacto aki. Seguramente cu e obhetivo pa mehora e bienestar di nos animalnan na Aruba.

E plan di accion ta consisti di un continuacion di e colaboracion entre nos Ministerio cu e fundacionnan y otro stakeholders. Hunto lo ehecuta campananan di sterilisacion y castracion den bario, cuminsando for di luna di juni. Microchipping tambe lo tuma luga durante e campananan aki. Alabes lo enfoca ariba campaña di conscientisacion pa e temporada importante aki.

Den e proximo simannan por bay mira diferente actividad tumando luga pa fundacionnan. Den luna di juni proximo lo bay cuminsa cu e prome campaña di sterilisacion den barionan cu tin mester di esaki. Pa mas informacion tocante e campanan aki por acerca e fundacionnan of CCC (Centro di Control di Cacho) via nan pagina di Facebook.

Nos Ley Bienestar di Animal (Landsverordening Dierenwelzijn) ta den su etapa di inicio y nos ta pone esaki como prioridad pa asina nos por pasa e ley aki e aña aki mes.

Esaki ta solamente e comienso di hopi otro actividadnan cu ta tumando luga pa mehora e bienestar di nos animalnan na Aruba y crea un ambiente mas consciente di nos animalnan.





# ACUERDO CU HULANDA TA TRECE TRANKILIDAD, TA HISA CREDIBILIDAD Y TA DUNA REBAHO DEN GASTO DI INTERES



Den un conferencia di prensa extra-ordinario Minister President a informa riba e Acuerdo cu Gobierno di Aruba a yega cu Hulanda riba, entre otro, e pago di e debe di e pandemia di COVID-19. Minister Maduro di Finansa tambe a hiba palabra pa asina por splica kico e Acuerdo aki por significa pa e finansa publico di Aruba.

## **Reduccion di 16 miyon den 2024**

E Acuerdo cu Hulanda ta trece cune un rebaho di interes di inmediato riba e debe di COVID-19, di 6,9% pa 5,1%. Esaki ta traduci su mes den un reduccion den gasto interes di 16 miyon

florin den Presupuesto 2024.

## **Reduccion di 306 miyon den 20 aña**

Banda di esaki e Acuerdo entre Aruba y Hulanda ta habri caminda pa asina cu yega na un Ley di Reino, pa por yega na un interes di debe di COVID na 3,4% cu por traduci su mes den 306 miyon florin menos na gasto di interes den e periodo di 20 aña cu mester paga e debe aki bek na Hulanda.

## **Inscripcion Hulanda pa refinancia debe internacional**

Den e Acuerdo tambe tin e posibilidad pa Aruba por refinancia e debe riba mercado internacional cerca Hulanda. Di e manera aki Aruba lo por yega tambe na mas rebaho riba e gastonan di interes.

## **Beneficio pa Aruba**

Banda di e reduccion den gasto di interes, e Acuerdo entre Aruba cu Hulanda ta trece cune trankilidad y estabilidad paden y pafo di Reino. E Acuerdo ta manda un señal positivo cu Gobierno di Aruba ta haci un trabou serio pa yega na estabilidad financiero y cu den esaki e ta conta cu e apoyo y sosten di Hulanda. E señal aki pa local y pa inversionista internacional ta brinda e trankilidad necesario pa keda confia Aruba cu nan inversion.

E ultimo aki ta traduci su mes tambe den mas credibilidad financiero pa Aruba den wowo di companianan di rating cu ta wordo sigui pa inversionistanan internacional. Pues e Acuerdo ta trece hopi beneficio cune pa e bon number di Aruba.

## **Gratitud na Minister President**

Minister Maduro ta gradici Minister President Evelyn Wever-Croes y e ekipo financiero y huridico cu a negosha cu Secretario di Estado Van Huffelen y su ekipo pa asina por a yega na un Acuerdo. Masha danki pa kere den Aruba!





MINISTER  
*Dangui Oduber*

## RESULTADO DI E PROME KWARTAAL DI 2024 A DRENTA TA SER DEMOSTRA CU E DEMANDA PA ARUBA TA KEDA UNO HALTO


Minister di Turismo y Salud Publico sr. Dangui Oduber ta informa comunidad cu e resultadonan di turismo pa e prome kwartaal di 2024 a dreña. A ser demostra cu analisis cu e demanda pa Aruba ta keda uno halto.

Minister Oduber ta satisfecho con luna di April a será cu resultadonan positivo. April 2024 a ricibi 121,215 bishitante cu a dreña Aruba cu un 9.7% den crecimiento. Aruba a ricibi un total di 96,060 turista crucero. Turistanan ta keda satisfecho cu Aruba y ta clasifica e "Guest Experience" cu un 9.0. E categoria cu a wordo mas mihor clasifica ta: ambiente cu 9.4. Ta midi e impacto economico aki cu Average Daily Rate (ADR) cu ta na \$294 y Occupancy Rate cu ta na 57% cu un entrada di \$20.155,958 pa e luna di April 2024.

Ta pa remarca cu e prome kwartaal di 2024 ta uno hopi positivo pa Aruba.

Un resumen di e prome lunanan di e kwartaal di 2024 ta lo siguiente:

- Januari 2024 a habri cu 117.172 bishitante y a ricibi un total di 123,374 turista crucero. Ta midi e impacto economico aki cu Average Daily Rate (ADR) cu ta na \$310 y Occupancy Rate cu ta na 77.9% cu un entrada di \$27.076.500 pa e luna di januari 2024.
- Februari 2024 a habri cu 122,149 bishitante cu a dreña Aruba y a ricibi un total di 128,386 turista. Ta midi e impacto aki cu Average Daily Rate (ADR) cu ta na \$284 y Occupancy Rate cu ta na 78.2% cu un entrada di \$22,005.276 pa e luna di februari 2024.
- Maart 2024 a ricibi 141,380 bishitante cu a dreña Aruba cu un 25.8% den crecimiento compara cu e mesun luna di 2023. Ta midi e impacto aki cu Average Daily Rate (ADR) cu ta na \$296 y Occupancy Rate cu ta na 70.1% cu un entrada di \$22,856.992 pa e luna di maart 2024.
- April 2024 a ricibi 121,215 bishitante cu a dreña Aruba y a ricibi un total di 96,060 turista crucero. Ta midi e impacto economico aki cu Average Daily Rate (ADR) cu ta na \$294 y Occupancy Rate cu ta na 57% cu un entrada di \$20.155,958 pa e luna di April 2024.



Pa conclui, Minister Oduber ta satisfecho cu Aruba ta keda un destinacion precioso pa hopi bishitante den caribe. Resultadonan ta demostra cu keto bai tin cifranan halto pa confirma e bon maneho.

Minister Oduber kier a gradici tur partnernan di turismo, ATA, AAA, APA, AHATA, ATSA y Aruba vacation rentals pa e resultadonan positivanan aki. Danki na tur persona laborando den e sector turistico, ban sigui demostra nos cordialidad y duna e hospitalidad na nos bishitantenan cu nos ta conoci pe.





## MINISTER GEOFFREY WEVER A ORGANISA SESION INFORMATIVO TOCANTE TRADE MISSION PA SURINAM



Despues cu a anuncia e Trade Mission pa Surinam di Juni 24 pa Juni 28 binidero, Ministerio di Asuntonan Economico, Comunicacion y Desaroyo Sostenibel, Camara di Comercio Aruba (KVK), Departamento di Asuntonan Economico Comercio y Industria, y Aruba Trade & Industry Association (ATIA) a organisa un sesion informativo diahuebs anochi pa tur esnan cu a indica di ta interesa.

Durante e anochi aki tur e comerciantenan presente a ricibi informacion necesario y e agenda di e mision comercial aki pa asina nan tambe por ta bon prepara pa esaki.

"Mi ta contento di mira e acogida pa cu e mision aki pa Surinam," Minister Wever a indica. "Cu e mision comercial aki hunto cu e comerciantenan cu a registra nos kier explora e posibilidadnan di comercio cu Surinam y asina purba stimula mas actividad comercial entre e dos Paisnan".

Surinam, manera ta conoci, ta un pais cu ta exporta azeta, oro, metal, palo, productonan pa construccion y mucho mas. P'esei e importancia di bai hunto como delegacion ta demostra tambe e interes y e seriedad di e mision aki. Comerciantenan local lo haya e oportunidad pa network, combersa y intercambia ideanan cu diferente comerciante Surnameño na Surinam.

Minister Wever kier stimula negoshinan local pa wak e mercado di Surinam como un oportunidad pa crece y trece diversificacion den nan portofolio di producto of servicio. Esaki lo duna e consimidor local tambe mas acceso na productonan posiblemente mas barata y di bon calidad, pero tambe por brinda e comerciante e oportunidad di exporta su producto of servicio pa Surinam.

Minister Wever kier a gradici KVK, DEZHI y ATIA pa nan empeño pa por haci e mision comercial aki posibel. ■





## SPORTS FOR TODDLERS A ESTRENA UNIFORM NOBO

Minister di Enseñansa y Deporte Endy Croes hunto cu su nieto Kai a bishita Sports for Toddlers cu a tuma luga den e gymzaal di E.P.B. Oranjestad. Durante e ocasion aki, Sports for Toddlers a estrena uniform nobo pa e muchanan di 18 luna te cu 5 aña. E meta di Sports for Toddlers ta pa promove un bida activo pa muchanan chikito. Nan enfoca ta pa train diferente habilidad motorico cu ta rekeri pa nan desaroyo den cada deporte, encurasha conexion social y percura pa bienestar di e muchanan.

Durante e mainta aki, e muchanan a practica diferente deporte entre otro, futbol, baseball, basketball y "all-around gym". E mandatario di Deporte ta encurasha e mayornan pa stimula nan yiunan pa desde chikito practica deporte pa inculca e amor pa deporte pa henter nan bida. Di e forma aki, nos ta preveni sobrepeso, obesidad cu ta conduci na malesanan cronico. Finalmente, Minister Endy Croes a gradici e team di entrenado cu tur fin di siman ta train e muchanan cu hopi amor, esta Sra. Joally Lake, Sr. Maurice Escalona, Sr. Steve Escalona, Sr. Rick Engelbrecht y Sr. Jursen Tromp. Alabes, ta felicita e team completo cu nan uniform nobo.





MEI 25  
7 AM – 11 AM

*Limpi*  
*Limpi*

# BAKI DEN BARIO SANTA CRUZ

NADI CROES & CRISMO ANGELA

ATA FPNC APEX DALTRA BCI SERLIMAR MY  
CONTAINERS ECOTECH ECOTECHFZ MINISTERIO  
DI NATURESA

LIMPI.AW





## Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

# 2024

AÑA DI STABILIDAD Y PROSPERIDAD